

© लक्ष्मीनारायण रणा

मूल्य-पैतीस रुपये

प्रथम संस्करण : 1985

सावरण : डॉ० प्रेमचन्द्र गोस्वामी

प्रकाशक : सुपमा-प्रकाशन,

नरसूर मेट के बाहर, बीकानेर 334 001

मुद्रक : सावित्रा प्रिंटर्स, बीकानेर

SAWAN-FAGAN'(Rajasthani Poetry)

Laxmi Naryan Ranga

मायड़ भोम, माँ अर मायड़ भाषा-भाव, रस अर
 चिन्तण री तिरवेणी । आ तिरवेणी जद मन, बुद्धि अर रसना रै
 कबळा-चीकणा मरुयळां रै कण-कण नै रस, रंग, रूप सू तरातर
 सीब'र सै सीवा-काकड़ा लाघ ऐकमेक हुय बेवै तद "सावण-
 फागण" री ससार रचीजै रसीजै-रगीजै, तद शिल्प अर कथ्य
 रै अभीण मोल्या चौक पूरीजै-सोनथाळ बाजै-केसर-कू कू बरसै
 कस्तूरी महकै.....

—रंगा

आप कोई पोथी पढो अर पढ़ते पढ़ते आप लिखार सूं बायेडो माडण री धारो, जणनं धणं हेज सू अन्तस रै नैडो सहेजणो चावो, एक हलचल माचं आपरै पाठक, समीक्षक अर रचनाकार रै न्यारे न्यारे स्तरां पर तो उण पोथी रौ जनम सारथक बजे ।

आज रै इण हवाई समै मे मची थकी भागमभाग में भी आदमी टेन काढ'र जे 'सावण-फागण' जैडो रगी चंगी व्यग्य-विचार री कोई पोथी पढणी चावै है-इण सोच विचार पाण पोथी प्रकाशन री मत्तो करघो, पोथी रौ मनोरथ सर्घी ।

कविता कोरमकोर नी मनोरजन है नी प्रयोग नाम धारी कोई चम-त्कारी चौलकौ-ना फेशन ना हाँबी ना 'शे मेन शिप'—कवि श्री लक्ष्मी-नारायण रंगा ब्वातर कविता है एक संवाद, मिनख सूं मिनख ताई एक मवादी मवेदना-आतम चेतना ।

भेळा बैठर कवा को गिणीजैनी । पण स्वाद आप आपरी न्यारो । गीता, गजला, तान्ही कवितावा (बीजिकावा) चितरामा अर व्यग्य विचार सैपूर कवितावा, काणिया अर नाटकां रा कलमघणी श्री रमाजी अर उणारै पाठकां रै बीच में पड़ै पण कुण ?

'सावण-फागण' पोथी रा चार चरण । गजल खड रा पारखी है डाँ० मदन केवलिया । बीजिका रा ओकारथी । चितराम रा डाँ० प्रेमचंद गोस्वामी अर कविता रा डाँ० नरेन्द्र भानावत । चार पारखी-एक कवि । असंख्य अनाम पाठक । ठंडी, लिजलिजी अर बैसके पडियोडी सी 'यथा-स्थिति' री भाटा-बरफ मंजं पीधलै-आ मंसा है ।

आस-उमीद है, राजस्थानी जगत इण पोथी नै हेता हेजा अपणास देसी—

भूरोखो

गजल	9
बीजिकावां	27
चितराम	47
कविता	73

परख

गजल	-डॉ० मदन केवलिया
बीजिकावा	-श्री ओकार श्री
चितराम	-डॉ० प्रेमचन्द्र गोस्वामी
कविता	-डॉ० नरेन्द्र भानावत

जुगबोध गजलां

श्री लक्ष्मीनारायण रंगा राजस्थानी रा धणा चावा साहित्यकार है ।
उणा जीवत अर जगत न खुली दीठ सूं संपूर सचेत संवेदना समेत सहेजी
है, सबद-सबद निरखी-परखी है । जीवन री पाणी उतरधां फेर बचै कई ।
गजलकार श्रीरंगा री एक बानगी—

उतर रियो हर चीज री पाणी

काई नी बची अब ओल्लाणी

मिनख री ओल्लाण री तलास गजल दर गजल श्री रंगा करी हे—
'सावण फागण' काव्य संग्रह में । जिनगाणी री संत्रास भोगै है— आज
आखी जमारो

फैलरियो है जं'र अब सांस-सांस में

पाळया पीवणा-सांप क अब केवां केनै ?

किणन केवां पीड़ा ! ओ सारथक सवाल गजललार री काव्य-मात्रा
रो तीख भरघो सुर है—

आदमी कितें रंगा मे रंग्यो हुयो है

ईसा तो अजं सूळी पै टंग्यो हुयो है

अन्तरिक्ष पोच र भ्यान गरीबीजियोडें, इण जुग पर किसोक गैरो
व्यंग्य है—

काळीदास हर जुग मे लेता रैया जलम

घरती-डाळ एटम सू काटै है आदमी ।

परख

गजलकार श्री रंगा कनै आपरी निजोनिजी पीड सिरजी' गजलां में
आदमी री असल टीस, धर्ण उफाण सूं उभरी है—

बीती आखी ऊमर तनै याद करतां करतां

धुंधळामी निजरां थारी उडीक करता करता ।

कवि आदमी । आदमी री ओळयूं अर ओळ ! जुगांजुग सूं बी-एक
अणंत उडीक लिया हिवड़ें रें हेत नै पाळें !

अंग्रेज कवि 'कॉलरिज' सटीक कैयग्यो है क' महान कवि महान
दार्शनिक भी हुवें । म्हारो आलोच्य गजलकार महानता री दीड़ भाग सूं दूरो,
पण इण असार संसार रो पूरो जाणकार है—

म्है तो पाणी रा आखर हां मिट जास्यां

म्है तो बाळू री लेंरां हां, मिट जास्यां

पाणी रो आखर आदमी/मदवर/बाळूरी लेंरां रूप आदमी आज है
काल नी । पण पाणी री टीम मांडणियो कवि मर मरनें अमर हुवें ।
श्री रंगा आपरें कव्य, आपरें सम्प्रेषण अर संवेदन रो एक माचो सजक है ।

डॉ० मदन केवलिया

वेच्या हाथ वाजार के अबे केवां केने,
माथा किया नीलाम के अबे केवां केने.

फैल रियो है जै'र अबे सास-सांस मे,
पाळचा पीवणां साप के अबे केवां केने

धोळा चोळा पेर लुकावे काळी देही,
बसै अठै किरकाट के अबे केवां केने.

मन घणो उदास तन सजियो-घजियो,
पौसाकी हुयो संसार के अबे केवां केने

बेचा घरम-ईमान के बेचां देस ने,
घर वण्यो मसाण के अबे केवां केने.

कठपुतळया रो देस हुवे अठै खेल अजूबा,
दो डोर दूजां रै हाथ के अबे केवां केने.

फोडा घणी वात, के ऊंचा भापण देवां
उलझिपोड़ा खुद आप के अबे केवां केने

मिन्दर मस्जिद भांग, जळावा गुरुद्वारा
जपां राम रौ नाम के अबे केवां केने.

पोष्या भणी हण भौत के 'आपो' भूत्या,
बिगडयो घाण रौ घाण के अबे केवां केने

ऊचा घणा मकान, मिनख वावनियो हुयो,
गुण पोच्या पताळ के अबे केवां केने.

मै तो पाणी रा बाघर हां मिट जासां
मै तो बाछू री लै'रा हां मिट जासां.

अकाम गरीबी री अगन सूं जळतो पानो
दुख-बादल रा दसपत हां मिट जासा.

सेजडी री मागरी ज्यूं चुटे आ जिन्दगी
सांसां रा मूया गोसा हां तिर जासा.

जीवण रै जंगल भटकै तिरमा मिरगला
आसा-दरपण रा चै'रा हां मिट जासा.

बिन रोटी रै तवै दाई जळ री जिन्दगी
भूखी भीता रा छापा हां मिट जासां.

लू रै लपरका दाई गुजर री आ जिन्दगी
सांसा-सतरंज रा मोहरां हां पिट जासां.

तीखा कांटा नू बिघ्यो बाग रो रुं रुं
फूला रै सोई रा छाटा हा मिट जासा

जन-जीवण बण्यो राजनीति री चौपड़
बोटां बिकयोडी मोटपां हां पिट जासां.



समं री चोट जिको सैवै है आदमी
सही साची बात कैवै है आदमी.

रिस्ता नाता सगळा काचें काच री पडता
किसी जमी मायें पग टिकावै है आदमी

हरियाळी मंजळ्यां रा सपना लिया आंख्यां
पीळें पतें रो जीवण वितावै है आदमी

बिस्वास आस्थावा सै तार तार हुयग्यां
कठें कठें कारथा लगावै है आदमी.

पर्यावरण री सांसां रेडियोधर्मी घूड
ब्लडकैंसर रो जीवण जीवै है आदमी.

सै दिसावा पै'री अन्व्यारी पोसाकां
किण अकास पै सूरज उगावै है आदमी.

पारदर्शी भीता वो स्वारथ री रचें
एकयूरियम री जिन्दगी जीवै है आदमी.

खिड़क्या रें फ्रेमां हर आंख अठें है कंद
सही साचो रूप किया जाणै है आदमी

सर्वाधिकार तो बेच्या मै दूजां रें हाथा
अनुग्रह री जिन्दगी वितावै है आदमी.



बीती आखी ऊमर तने याद करतां करतां
घुमलागी निजरां थारी उढीक करतां करतां.

हर बादल रै साथै म्हेँ बहाया आमूँ इत्ता
सावण भी सूपग्या साथै आमूँ भरतां भरता

तने दूढ़णै रै खातर म्हेँ किया सफर इत्ता
दिन-रात भी थक गया म्हारै साथ चलतां चलतां.

थारी याद री अगम मे म्हेँ जळायो मन इत्तो
चान्द-सूरज पडधा फीका म्हारै साथ जळतां जळता

हर जिन्दगी मे मिलमा ओ कवल हो थारो
वमो हुयग्या जुदा थे म्हारै साथै चलतां चलता

जुगा जुगो सूं पैछाणै ए प्यार करणवाळा
कयो हुयग्या अणजाण थे पैछाण करता करता.

हर जीवण बणै प्यार प्रेम इत्तो सोरो कोनी
मुस्कल सूं मिले प्यार कैई बार मरता मरतां

हर पाव बणै मुकाम ओ जरूरी तो कोनी
मिले प्यार री मंजल कैई जीवण चलतां चलतां.

बस इत्तै से ई दर्द सूं यू तड़क उठयो मन
ए प्यार रा है धाव, ए भरसी भरतां भरता.

थारी बदनामी रै डरसूं न लियो नाम थारो
म्हारै होठां आग्यो धारो नाम मरतां मरतां.

हर सास पर सदा म्हेँ लियो है नाम थारो
म्हारै दम भी निकलसी यनै याद करता करता.



ओ दिन घणों अन्धेरो है
हर रोसणी पर पैरो है.

मंथण कर इमरत लाया
काळा नागा रो घेरो है

ऊंची मेढ़ी ऊग्यो सूरज
गळपां रो भाग अन्धेरो है.

बसन्त मे पेढ नागा-भूखा
ई जमी रो दुख गैरो है.

जमी-आकडा फसला ऊग
खेत भूखां रो डेरो है.

मिनख गमादी सं पंछाण
मुखौटो ही अब चैरो है

हर अवाज वणगी चीखां
कान जमीन रो बहरो है.

गाव-गांव बस्तरा बल्ले
किण रौ ओ पगफेरो है.



आदमी कित्त रंगों में रग्यो हुयो है
ईसा तो अज सूली पे टंग्यो हुयो है.

चान्द मंगल भाथै बसर्ण री योजनावा
घरती भाथै फेरुं भजहबी दंगो हुयो है.

अहिंसा री घरती पे ऐ ऐटमी फसलां
भारत री गांधी फेरुं नागो हुयो है.

पर्यावरण नै हाथां जैर पा रियां हां
हेमलोक पीयर कद मुकरात चगो हुयो है.

सम्यता-संस्कृति नै सवारण री दावो
आदमी है के थोड़ो और बेढगो हुयो है.

ऊजली खोला पेर काळा अजगर धूमै
जन-सेवा भांस री धंधो हुयो है.

ग्यान री सीढियां चढ़ारियो है जितो
आदमी बितो ई चितबंगो हुयो है.

घरती नै सुरग वणार्ण रा सुपना
प्रकृति री आंचल बदरंगो हुयो है.



घोफेर घिरी ऊँची दीवार
बूण तोहें काली मीनारा.

भगळें नागर काई छाई
काई हुयसी काकरी मारघा.

आदमसोर ओ जुग बण्यो
अठे मास रा सैं बिणजारा.

सोने खातर बळें सीताया
काई करें जनक दुसियारा.

मिनल जै'र रो बण्यो सीदागर
ढरता फिरें माप बिचारा.

गूगी बस्ती है बोळा लोग
बुण मुणें दुग भरी पुकारा.

जीवता मिनल तो मरें भूगा
भोग लगावें देवता मारा.

मिनल माप री पैं'री काचळी
नागा हुया सैं नाग बिचारा

□

दुख सूं मुजरी रात सारी
यूं ई बीतरी जिन्दगानी.

घरती तिरसी रेंई तरसती
कदं न बरसी बून्द पाणी.

चैन-चून्दड़ी कदं न ओढी
मूं पीड़ री हूं पटराणी.

मीठी मुलक रची ना होठा
आसू जीवन री सेंनाणी.

कठं न मिल्यो सुख-सुवागत
फरं दुख मगळे मिजमानी

भन रो मैल सूनो सिसकं
सुख री हूं सुवागण राणी

दुख री जमी, जळण-अकास
—जीवन कुळण है आ जाणी.

सुख सूं रिस्ता नी निम्मा
दुख सूं है पैछाण पुराणी.



हर किरण कर लियो अधियारां सूं करार
अबै किण सूरज पर एतवार करां.

हर कलम ई विकगी जदं नरक
अबै किण कलाम पर नरक बन

हर धरम बणग्यो राजनीति अठै
अबै किण मसीहा पर एतवार करां.

हर रिस्ता थामी जदं नै नरक
अबै किण दोस्ती पर नरक बन

हर भीत री नीव खड़ी है थोप न
अबै किण छत पर एतवार बन

हर पग नै दरे नरक
अबै किण जदं नै नरक बन

सँ जीभां पे लागी राख नै नरक
अबै किण अवाज पर नरक बन

हर बदनै नरक
अबै किण नरक नै नरक बन

कित्ता रंग अर रूप बदळै है आदमी
किरकाट नै भी लारै छोडै है आदमी.

ले राजघाट री सोगन, सान्तिवन में संकळप
सघै जे स्वारथ दळ बदळै है आदमी.
असलियत कांई नी बस पडत ई पडत
कादां री फसला निजर आवै है आदमी.

सत्ता पावण नै तो घणां लट्ठरिया करै
मिल जावै चोट, चोट मारै है आदमी.
काळीदास हर जुग लेता रैया है जलम
धरती-हाळ एटम सू काटै है आदमी

ईस्वर अक धरती ई, सूपी ही मां सी
टुकड़े पे टुकड़ा उणनै बाटे है आदमी.



अकास धुंधलायोडो है
आदमी उफतायोडो है.

भागै सगळी ओळखाण
आदमी सतायोडो है.

मूढं माथं गुळक रची है
आसूँडा लुकायोडो है.

बिम्ब सैं बिखर रिया
दरपण तिडकायोडो है.

गुलाब विस कांटा बणै
आदमी रो लगायोडो है.

सुख रो सूरज तड़फड़ावै
सूळी पर चढायोडो है.

मन रा ताळा ना खुलै
कूची गुमायोडो है.

होठां माथै खीरा उछळै
पेट रो भडकायोडो है.



उतर रियो हर चीज रों पाणी
काई न बची अब ओळसाणी.

कोयला सँग भकराणा बणग्या
काळें-घोळें री नी पँछाणी.

ऊचां मैला लहै सिधासण
करै जनता री कुण निगराणी.

सँ निजारा दिखँ धूँधळा
आख्या चांदी पाट्या-ताणी.

मिलँ न्याब नँ फांसी हुकम
कलम इन्ध्याब चालँ तूफाणी.

आंधो इतिहास साहित्य मूगो
बोळें जुगरी आ संनाणी.

होठा ठुकी सोने री मेला
कुण कैवँ दुखा री काणी.

जिका बिक्या बजारां बिचाळें
बोल सकै कठै वा मे पाणी.



वसुधैव कुटुम्बकम् पण कोई नी आपांरो
घरती रा हा जाया पण घर नी आपारो.

अब सुतन्तर हां आपां ओ स्वराज आपांरो
पण हर तन्त्र पर सूं उठगियो पतियारो

अहिंसा परमो धर्मः ओ सिद्धान्त आपारो
आग, डकैतो, हत्या, बलात्कार रो निजारो.

हाथां रंगीन टी. वी आंखयां उपग्रह प्यारो
भूय री अगन मे जल्ले आदमी बिचारो

अे न्याय रा तराजू, आयोगा री रपटां
भ्रष्ट चक्रव्यू री नी टूटगियो किनारो.

बहलासी कद ताई, ओ चान्द रो खिलौणो
बिना दूध मरै, जद आख रो ई तारो.

अे सुस्त सुस्त भवरा, अे मरी मरी तितलछा
कद दिख्ता पासो ए वसन्त रो निजारो.

योजनावा पंचवर्षी, ओ बीस सूत्री नारो
उम्मीद में ही मरगयो ओ जमानो बिचारो



अन्धारी नगरी में आंधा बर है लोग
खुली आंखियां लियां अठें सोवें है लोग.

हाथा मे मसालां जत्या रा जत्या
दिन रा उजाळा गुम जावें है लोग.

आवणिया दिनां रा ले भीठा सुपनां
बाजीगरां सूं सदा ठगीजें है लोग.

जड़ांमूल खाणें री, मनसा लियां मनां
मूँहें पे अपणायत दिखावें है लोग.

ऊपर सूं रंगमैल सी बमक-दमकः लियां
मांय मांय तरेड़ा, सी पावें है लोग.

मकड़ी रैं तन्तर मे जाळा ई जाळा
तन-मन सूं फांस्या, तडफड़ावें है लोग.



मिनख जूण
रोटी रोटी,

काली-घोळी
गोटी गोटी.

आसू धार
मोटी मोटी.

दुख ढोवें
रोती रोती

चूकं करज
कोडी कोडी

बिके मजूरी
बोटी बोटी

जीवण घाणी
जोती जोती

जीवें जिंदगी
छोटी छोटी

दुख जमीन
मोटी मोटी.

आसू बीज
बोती बोती.

कांटा फसलां
ढोती ढोती.

मूळ धन है
खोती खोती

मिनख नईं है
ढोळी ढोळी.

सांस बिके
भोळी भोळी.

जिंदगी बस
खोळी खोळी.

कान बेच्य़ां
बोळी बोळी.



जिन्दगी नारेल री जोटी बणी
गिरी गिरी देवतां रै भोग चढ़ी.

जिन्दगी तावड़े में भीत लड़ी
छांया छांयां सँ सिधासणां पड़ी.

जिन्दगी काळज री फालो बणी
मुळक मुळक पइस रै होठां चढ़ी.

जिन्दगी मरुयल मे छांट पड़ी
कूँ कूँ बिरखा दूजां रै आंगण पड़ी.

जिन्दगी दुला री अणखिली कळी
सौरम सौरम ऊंचा मँलां बड़ी.

जिन्दगी लीर लीर गूदड़ी बणी
गीदया गीदया ऊंची खुरस्थां बड़ी.

जिन्दगी आसावां री लाम्बी लड़ी
मोती-माछा मालकां रै गळे पड़ी.

जिन्दगी रिगसती पगयली बणी
मजळी मजळी सँ ताळी बन्द पड़ी.



मिनख बधतो जारियो है
मानखो घटतो जारियो है.

जित्ती ऊंची चढे रुख ओ
जड़ा छोडतो जारियो है.

जित्ती तेज हुवे रोसण्या
अन्धारो पसरतो जारियो है

संडकां रं जंजाल बिचालं
नगर उलझतो जारियो है

दे'र मिनख धणी पौसाना
नागो हुवतो जारियो है

इण अन्ध्यारै सह्र माय
सुरज भटकतो जारियो है.

ऊंचा सुरा मे गावे गीन
ओ रोवणो लुकारियो है

होठां मू मै साधे गिस्ता
मन सू टूटतो जारियो है

पमरै काई पडतां पडतां
सरोवर मडनो जारियो है.

फैलै चौफेर टीडी-फायो
ओ बेत खजतो जारियो है.

सुतगतरता री दुकान सू
नुई मांफला भड़वा रियो है.

हथियाग री बिकरी खातर
देमा नै लड़वा रियो है.

□

राम राज में तावड़ो ई छाँया है
अठै सब पडसैं री माया है.

भैरूजी घणा मारै मजा
भोपा दुख सताया है.

साथ चढ़ै सूळी माथें
झूठ रा राज सबाया है.

भाटा बोत देवें परचा
मिनस लगाम लगाया है.

सोने माथें काट चद्दो
पीतल झोल चढाया है.

गंगाजल सूं न्हावै गधा
आदम मरै तिसाया है.

घा'रें सू आजाद दिवा
ऊमर कंद भोगाया है.

जा नै मायें ऊच्या फिरां
खाडा बाही खुदाया है.

दास जनम्या दास मरिया
आजादी फल चखाया है.



एक सांवठी छीड़ मांयली छिब

‘बीजिका’ नांव सटीक । कविता री अणिमास री अहसास !
बीजिका-एक सबदबोध ! सबदाखंरा रें आरपार होवै कवि । प्रकृति
री गति, स्थिति अर कृति-मति री सौ ग्यान-उकरास जद बी
‘शब्दाणु’ विस्फोट सरूप करै तो आखर आखर अपार पण सरब
मुलभ सहज सरजणा री घणियाप धारै ।

इण कूंत पेटे मरुघर मोभी कवि श्री लक्ष्मीनारायण रंगा री
बीजिकावा पासो निजराळं तो मनै लागं क’ अठै जावती कविता
भीड़ मूँ परबार हुयर इण जीवन-जगत री छिब, एक सावठी छीड़
में उकेरै ।

एक ही शब्द मे सौ कई । चार पाच री जोड़ अगाडी सबद
हाकाबाज, हुंवता दोसै । की रंगा-रगत देखो विन्दु मे सिन्धु रूप-
जिन्दगी/खारे पाणी री भील/मौत/काचो काच/ईमान/किगाए री
होडिंग/पेंछाण/स्टीकर जठै चावो चेपो/घरम/गोला बान्दरां रें हायां
चक्कू/दहेज/समठूणी री तेवड़ मे घासलेट री डब्बो/महानगर/गंस
प्रदूषण रा प्लान्ट/इज्जत/मल्लियोडी फीसती धोती/नौकरी/सांसां री
अडाणगत/विधवा/विना हत्ये री घट्टी/वासना/खालियो/दिन/ईनाम
बायरो लौटरी री टिकट/जस/बरतण खुदियोडो नांव/हेत/राचणी
मेहदी/भगवान/हुवा कठै कोनी ।

पश्य

अणुवंती कविता खातर की कंणो न सुणणो । मायलो मरम-
नान्ही कवितावां री भरघो तरघो जमारो । जे दो आखर री सांवट नी
सभळें तो पाठक ताई कविता याने मैस ताई भागीत ।

श्री रंगा कनै सबद-संगत है । सबदा रें इयै-भाइपें मे कवि री
राजस्थानी काव्य यात्रा री आयाभ मनै उजासवंत लागे । ‘सावण
फागण’-काव्य संग्रह री आ बीजिकावां मे एक बीजिका हो जे लोक
रें चित चढ़गी तो कवि कृतिघन्य हो जासी ।

***‘समठूणी री तेवड़ मे घासलेट री डब्बो’-दायजे री ओ
पीड़ भरघो सम्बोधन-ममाज-क्रान्ति री महाकाव्य है ! आ लंण
श्री रंगा री ही कलम लिख सकै । आ ही सगती । ओ ही सरण । आ
ही जुग-टीस । कवि री यात्रा बघासी । ओ पतियारो है ।

जीवण

तार माथे

झरू-झरू

बुन्द.

मिरतू

झणकार करतो

दूटियोडो

तार

जीवण-मिरतू

ट्यूब लाइट करे

“जग बुझ

बुझ जग

जग बुझ “

“ बुझ “

बाळ मौत

आंगणें बरसी
नान्ही सी

छांट भर
सूखगी.

जवान मौत

खूब बधियोडी
गुडका खावती
किन्नी,

तेज हवा सू
खूसगी
हाथा मांय सू.

जीवण

जुगां सू
अगन-तिरस
लुकायोडो

मरुपळ.

मौत

काचो

काच.

जिन्वगी

रीफिल " "

जिन्दगी

खारे पाणी री

भील.

फूट

जठं

सेरी हुयसी

पाणी

बठई

मरसी.

कळह

तेज तावड़ें सूं

फाट जाय

भागणें री

सिरमट भी.

पाप

खाडो खुद

मैलें सूं भरें

दूजा पर भी

कादो उछाळें.

ईमान

किराये रो

होडिंग.

श्याव

सोने री

ताकड़ी.

पैछाण

स्टीकर

जठं चावो

चेपो.

शिक्षा

“बोल पट्ट
सीताराम”.

आज रो ग्यान

परदेस्यां रै

मूँडा रा

ऐँठा

कया.

धरम

गैला बान्दरां रै

हाथी

चक्कू.

दहेज

समठूणी री तेबड भे

घासलेट रो

ढब्बो.

नुई संस्कृति

तुलसी धार्म में

थोर उगावणों.

परम्परावां

रैपर, रैपर

रैपर

किताब

कठई नई.

महानगर
गैस-प्रदूषण रा
प्लान्ट.

सुरक्षा
भागण ई
कुओ.

इज्जत
गळियोडी
फीसती
घोती.

प्रगति

एक सड़क

स्पीड ब्रेकर री.

विकास

स्टैन्ड माथे खड़ी

साइकल रा

पैडल भारणां.

प्रतियोगिता परीक्षा

काच री

भीतां माथे

पंजा

जमावणां.

नौकरी
सांसां री
अडाणगत.

मिनख
आगी माथं
बढ़ियोड़ो
बिना सेपटीवात्व री
प्रेसर कूकर

लुगाई
सो रस कस काड़
घाण,
फैकियोडी
चाय री पत्ती.

बिधवा

बिना हथै री
घट्टी.

बुढापो

तल्लंटी मे
आथमतो

सूरज

जोवन

किरकट री

नुई दड़ी.

कुंठा
मोली रो
डाटो.

हटा रिस्ता
भीत सूं
उतरियोड़ा
लेवड़ा.

दुखी
सील खाई
भीत.

काम

बाछू री

लैरां मे

पधकती

अगनी.

वासना

खालियो.

अहं

शीत में' ल भांय

बळती

भैणवत्ती

आबादी
कीड़ी नगरो.

दिन
इनाम बायरो
लाटरी रो
टिकट.

भगवान
हवा कठै
कोनी ?

घरू रिस्ता

नगर मे

घर कम

होटल घणां.

पतियारो

घणां जतनां

सभाळयो

सिक्को

खोटो निकळ्यो.

करम फळ

आप रे

नखा रा

भरूटिया.

यादां

कजलीजियोडा

खीरा.

जस

बरतण

खुदियोडो

नाम.

जवानी-बुढ़ापो

ढाल चढ़णो

ढाल उतरणो.

हेत

राचणी

मेंदी

प्रेम

बिरखा मे

निकळसो

तो

भीज सो

साच-भूठ

काया

अर

छाया.

पाप
सरीर माथं
तो
मल चढसी.

सम्यता
रै प र.

यांभडी
बिन मोती री
रीपी.

परिवेश

जे आंगण

काळो हुसी

पगथळयां

मंली हुसी.

सामाजिकता

दूजे घर रो

धु'ओ

पीवणां पडें

आपां नै.

वातावरणं

रेडियोधरमी

घूड.

खोड़ीलो

सड़क रो

खाडो.

कपूत

कुठोड़

पच्चियो.

मिनख

हाड-मांस रो

चित्तराम.

कलम रो कमाल

रंगा री "सावण-फांगण" पोयी में सबदी री भीणी-भांक अर
भांकी रो दरसाव 'चितराम' खड मे अखंड अर अमंग-रंगपूर !

चित्त दीठ चितराम चावें दीठ चावें चित्त कविता पढणियो नी,
भणणियो-गुणणियो चावें रस पूर पाठक !

सावण में फांगण-फांगण मे सावण एकोएक । गेरियो अकाश/बादली
कड़ाव/पून री पिचकारघा रंग बरसैं/घरती गणगोर/सावण मे सांतरी
होली मची/सावण-फांगण-एकाएक चितराम !

'ताळतळाया मे तिडकते आमैं री दरपण ।' 'बादळ' मे अकास रैं
जंगळ मे सावणी सेवण चरता सुसिया ! 'सूनो आकास'/मीसम रैं मिजळें
छोरे हवारैं बतरणें सूं कोनी माडघो एक भी बादली-आखर ! 'भड्ड'/ओ
आभो है क किणी दुवागण री आख !

परख

'नान्ही छांटां री विम्ब रूपक थी रंगा री कलम री कमाल देखो-
"सिरमट रैं आंगणे मांय ए काली मिरचां कुण बिखैरी चौफेर !"

सावणियो घोबी ! अकासी पीजरो ! अकासियो अखबार । गोरबन्द ।
भूमळ री मेड़ी-अे खाली-माली कवितावा रा चितरामी सीरसक ही नी है
अे है एक पूरा पाठा जीवता-जागता चितराम । बिरखा में घरती-अकास
अर आखी प्रकृति रा इसा रगीला, रसीला, रूपाळा अर सांस्कृतिक
चितराम भारत अर बिदेसां री दूजी भाषावां मे देखण नै नी मिलें । ओ
रंगा जी रो, आपरी निजू रचाण-बखाण रो तरीको है । आ राजस्थानी भाषा
नै उणां री अनूठी देन मानीजसी । पैली बार प्रकृति रा सोवणा-मोवण
चितराम नुई नकोर शैली में रंगा जी री कलम सूं रचीज्या है-अे आपरी
परम्परा थापसी-पतियारो है ।

डॉ० प्रेमचन्द गोस्वामी

सावण-फागण

रग रमण रै
चाव सूं
गैरियो-अकास,
घोळ राख्या है
रंग-रंगीला
बादली-कड़ाव,

पून री पिचकारथा सूं
बौछारा री घारां सूं
रंग बरसै
घरती गणगोर पर, र

रंग री राणी
घरती घिराणी
उडा री है
सतरंगी गुलाल
चारू' पासी-क

सावण में
सांतरी होळी मची
रग-रम रूप रची.

रंग- पंचमी

अकास

खेल रियो है-

फाग

घरती साथै,

बरसा रियो है

रस-रंग री बौछाड़,

उडारियो है

रंग रगीली गुलाल-र

इण रंगपंचमी रै

कामण गारै

मौसम में

सरस डूबी

घरती

माघी झुकाया

भीजती जायरी है,

रगीजती जायरी है

रसीजती जायरी है

पसीजती जायरी है.

बादल

अकास रै
जंगल माय
सावण री सेवण

चरारिया है
नान्हां नान्हां
धोळा-धोळा
सुसिया-कै

पून रै खड़के सूं
अचाण-चक
कठीनं भाजग्या,
कठई निजर नही आवै
दूर दूर . र दूर ...र
तक.

ताळ-तळायां

रात बीजळया
इसी कडकी-क

तिडकोई काच रा
टुकड़ा-टुकड़ा
किरचो-किरचा
दिगरगी
भरती मायं-

आमं री दरपण
तिडकग्यो,
रात
बादल
इसा गरज्या-कै

दिनूगं री
सोनल रोसणी में
शल-भल, शल-मन
शल-यल.

मावण-कागण

सूनो अकास

अकास री पाटी

माये

मोसम रं मिजळं

छोरं -

हवा-रं बतरणं सूं

कोनी माण्ड्यो

एक भी

बादली-आखर-र

पाटी पडो हे

सफाचट.

साफ अकास

अकास

सावळ सरियां

भाडियो-भूँछियो

स्याम पट

जिण पर

कढेई,

कोई

चाक रो

निसाण तक

कोनी.

बादल बणिया चितराम

आ
अकास रे
ऊंचे हिमाळे मागे
आगे-आगे
जा री है
'सैनी' सुन्दरी
बरफ सी घुळती
अन्तस री आग सूं-

सारं सारं
उणनें दुंदुतो
जारियो है-
'बीजो',
बिजोग रा गीत
गांवतो-
गळती-पिपळतो.

बादली-अकासियो

आ कुण
रंगभीनी-रसभीनी
भूमल,
महेन्द्रू री
उडीक मे
संजो राख्यो है
बादली-अकासियो-क
उण रे
सोनस-दिवळं रा
अपका-पळका पढ़ं
सगळं अकास .

भट्ट

टप - टप-टप

टप - टप-टप

ओ

आभी है क

किणी दुवागण री

ओख ?

भट्ट

लागै - क

हुवावा करलियो

अपरण

बालकिये-बादल री

अर

आभी-घरत

बापडा

तरसे-सूरे

लगोलग.

नान्हीं नान्हीं

छांटां

सिरमट रै

आगणं माय

ए

काळी मिरचा

कुण बिसेरी

चीफेर.

पेड़ां माथै बूदां

नानी मां री
काणी रा
मोत्यां रा रुंख
सांपडतेक

डाळ - डाळ
पत्ता- पत्ता
झळमळ-झळमळ करै
मोती.

सावणियो घोबी

सावणियो घोबी
बादळां रा गाभा घोमर
अणनिचोया
टांग दिया
हवा रै तारां माथै-र
आला गाभा सूं
टपकरियो है पाणी
टप टप - टप टप
ट
प.

कळपती पत्त्यां

भायली-बादली नें
कळपती-रोवती
देख 'र
बिरछ री पत्त्यां भी
रोवण लागगी,

बादली तो
थक र थमगी,
पण पत्त्यां
आंसूझा
ठळकावती रई
घणी ताल तांदें .

बिरखा री रात

बिरखा री
रात,
काजळ रें
कूपळें मांय

दुवागण री
आंख रें
आसूं री
सजळ झुन्द.

चौमासे री धरती

चौमासे री
धरती,

रंग रंगीली
चटाई .

बिरखा में मरुयल

बणग्या
वाळू रा थोरा
सोने रा पाइ,

उण मायें
बरमं

नीचे
बवं-

मोती री बीछाइ,

चांदी री धारा .

बिरखा री पून
बिरखा री
ठडी पून
जाणी

सोरें मन सूं
निकलियोड़ी
भासीस.

हरी घास पर बून्दां

इण

हरिये मुवटिये री

पाखां

हीरा सजी,

चूँच
मोतीड़ा भरी .

अकासी-पोंजरो

अकास रै

पीजरै मांय,

पून

कैद कर दिया—

रंग रंगीला

दादली-पंछीड़ा नै.

अकासियो अखबार

दूधिया

अकास मायै

उडतै पंछीड़ा री

लाम्बी-ओछी

टेढी-मेढ़ी

कतारा.

जाणै

अखबार मांय

छपियोड़ी

गुई कविता.

अमर छूनड़ी

रंग रंगीळो

मावण

जाण

गुरगो

अमर छूनड़ी .

किरणाळ चादळी

पून

लगा री है

अंगूरिया ओढणी रं

घारुं पन्ना

कनार

चमचमावती.

सावणी धरती

मावणी

धरती

मटियोडां

चटियोटां

गुरगो चंग.

सावण

जावता बादल

जा रियो है

होळै-होळै

ऊंठां री काफलो

घर मजल्या

घर कूंचा

अकाम रै मरुधळ मांय.

बीजळयां

ओ

भासळ रात नै

बादळा री ओट

कृण करै-

बेलिङग, कं

उण रा

पळवग-भपका

मूण नी दै ?

तेज छाटा

मोगम री

कुचमादन

छोरो,
पेरगो
पून रा वषर
बादलों रें
तत्तं पार्थ-र
बून्दां री
सेन मास्यां
उडी-भिणकी.
भण-भण-भण-भण.

पाड़ा बैवती पाणी

ममनाळू
मां री
हरी काचळी-कुडती
चीर'र

हांचळीं सूरू
बैवती
वूध री धारावा.

फुंवार र तारा

मोसम महाराणी
घुमा री है
अम्सीकली री
घेर घुमेर
बादली-घाघरो,

जिण रै
लूमते-झूमते
नाडे मे
जड़ियोड़ा
तारा-मोती,

कली-कली मे
टकियोड़ा
रग-रंगीला काच
करै
जगमग-जगमग.

फुंवारां बिचाळे

पून रा लैरका

बादलियो बापू
पैप चलावै
पून भायड़
भांगण धोवै
भीतां-घर
डांगलो धोवै
सरढऽऽऽ, सरढऽऽऽ
सरढऽऽऽऽऽ.

हरिया बूँठा

सावणो

रंगरस पियोढी

सोनल घरती

माथे

हरिया हरिया बूँठा

जाणें

हरी-हरी डाळयां बैठघा

पाखंडळयां

फड़फड़ावता-

हरिया-हरिया

सुबटिया.

हरियाळी

अकास-

सूरज री

सोनल-रूपल

कलम मूँ-र

हरियाळी री

हरी स्याई मूँ

कर दिया

घरती रें कोरें

कागज माथे

दमखत

ठोड़-ठोड़.

पाड़ा माथे बादळ

पाड़ा नै

लाग गी

लू-

जणई

सावणी-राणी

समन्दर री

कटोरी मांय

भिजो-भिजोर

बादळी-रुई रा

फवां

उणरें माथे

सपावें-

उतारें

पाड़ा लूमता बादळ

बिजोगण

यक्षणी

भेज्यो

परेम-सनेसो

यक्ष नै,

जणै ई

बादळ

पाड़ा माथे

झुक-झुक आय

लुळ-लुळ जाय

बिजोगण रा

आंसूडा

बंवाय .

छांटा-छिड़को

आमं बंठी

काली कळायण री

लालर ओढियोड़ी

बूढकी बिरस्ता,

हवा रं हाथा

छाणै

बादली-चाळणी-र

नान्हड़िया छणै

छण-छण, छण-छण, छण-छण.

काली-कळायण

काला गाभा

पैर'र

काला केस

बिखेर-र

आ कुण

पसरी पड़ी है

ऊ धै मू ढै

कोप भवन मे

केकैयी .

बौछाड़ा

अकास स
लटक री है

बून्दा री
रंगरंगीली
बानरमाळ

आडी-टेडी
लड़ालूम
झड़ा-झूम.

फूल गुलाबी

सूरज री
किरणां-

खिलादें
जगा जगा
बादला मे
गुलाब रा फूल'र
आभी हुयजायें
फूल गुलाबी.

श्रेक और मेघदूत

चौमासे रो कालीदास
रचरियो है
अकास रं
ताड़-पत्तर माथे,

पून री कलम सूं
बादली छन्दां मे
एक और "मेघदूत".

मलजी मोर बोले रं

ऊजली चारणी री
आतमा री कुळण ..
धुळणी

मोरा रं मन मे क—
पळपत्त
छिण-छिण
रटै-
मेहा आओऽऽऽऽ
मेहा आओऽऽऽऽ

रंग रंगीला बादली

चितराम

ओ कुण

भोपो

अकास माथे

मांड राखी है

पावूजी रो फड़-अर

उण

रंग रंगीला चितरामा रा

जसगीत

गारियो है

पून रो टेर में-

बीजलयां रा छमछमा'र

गरज रो डोल

वजा बजा'र.

घुल र बरातो दूजो बादल

अकास माथे

पंख पसारथा

उडती जारियो है

अमर पछी,

अमर गीत गावतो-

जिकी

देखता-देखता ही

जल-पिघल जावें

सूरज रो अगन सू-र

थोड़ी ताल पछे

उण राख माथे सू'

उडतो निजर भाव

दूजो अमर पछी.

गोरबन्द

ओ सुरंगो बाभो है क-

इन्दर धनुस रै

सतरंगी साटण सूं

हारे समन्द री

बादली कोइयां सूं

बीजळयां रै

चिमकणा काचां सूं

किरणळ फुन्दां सूं

लड़ालूम

—गोरबन्द !

छोटी-छोटी छांटा

बादलियो बाळक नै

जगावण सारू

रात मासी

कैर रयी है

पाणी रा छाटा

रै रै रै ।

लोर

इण अकास री

रध-रोही में

ओ कुण भरै

दाकळ ?

कुण चावं

पून री

पातळी

कामडी ?

क'

घोळी घोळी

भेड़ा भाजं

दड़बड़ दड़बड़.

कस

गरमी

कित्ती आकरी है क'

अकास रे

याभा माथे

जमग्या है

पसीने रा स्याळ.

भाजता बादल

रंग रंगीली
बादली-तितल्यां
उड री है-

अकास रे
बाग-बगीचा मांय-र,

पून री गैली
छोरी-

भाज री है
लारें-आगें
तितल्यां पकडन नै.

भांत-भांत रा बादल

चोमार्न
आपरी
अममाणी दुकान मांय

खोल नाह्या है
रंग रंगीला
जालीदार
कपड़ा रा
धान रा धान.

नों बरसै

दूता

काईं ठा

काईं कै दियो-

बिरसा नै-क

मूढो सूजायोडी

बैठी है-

न मुसकै

न मुळकै .

मूसळाधार

बादळ बैठी

बिरसा-गोरबी

बलावे

धारावा रा

मूसळ

धमै धमै

घरती री

ऊँयळी माप .

धरती-अकास-वादळ

धरती र

अकास,

सीपी रा

दो पाट-

उणा रै

बिचाळै

पळै

बादळी-मोती.

धोळो धोळो अकास

मीसम-महाराणी

करण नै

सावणी

सोळह सिणगार,

उठायो

अकास-दरपण

पण

राणीजी री

गरम गरम

हवाई-सांत सूं

जमगी

दरपण माथे

भाप.

सिंहिया रा

वादळ

गायण री

गोन चिडहली

गरनाटा भरे,

मिहिया रे

अजाम मार्ये-र

लारं-लारं

उपरी

गोनल पांगी

चिलकं

धमचम धमचम.

भूमल री मेड़ी

गायण री भरघळ

रंगा री

सागर

घोरां घोरा

लहरी लहरी,

चिमकं

गतंभी किरणां, र

भरघळ धण जावै-

रगरंगोली,

काच जड़ियोड़ी-

भूमल री मेड़ी.

मिनखांचारै री वन्दना

श्री लक्ष्मीनारायण रंगा री कविता में तरै-तरै रा स्वाद अर अनुभव है । कवि रै अनुभव री दुनियां लांबी-चोडी है । बीमं टेढ़ा-मेढ़ा, वाकाचूका, चिकणा-चपटा, हल्ला-गैरा, खाटा-मीठा, हाऊ-भूँडा घणाई रंग, तेवर अर चितराम, मंड्योड़ा है । कवि री दोठ गैरी अर व्यापक है । वो व्यक्ति अर समाज, देस अर धरम, कुदरत अर बणावट पर आपरी तीखी प्रतिक्रिया व्यक्त करै ।

आज री मिनख सरल अर मीघो कोनी, निरमल अर निरद्वन्द्व कोनी । वो आपरै अस्तित्व खातर लड़ै, बीजां रै अस्तित्व नै चुनौती देवै, संघर्ष करै । बीरो आपो उलझयोड़ो है, भात-भांत रा तनाव अर दयाव सँ दयोड़ो है, घुटन, निराशा अर कुंठा रो अंधारो बीनै निगळै, वो छटपटावै बीरो विराट रूप घिस-घिसारै 'चिन' मात्र रै जावै । 'बैमीला रिस्ता', 'आत्मा कलम रो सीता', 'परस्परवा', 'आज री मिनख', 'अकासियो', 'आज री घर', 'दू बी ओंर नौट दू बी', 'कैवटस अर हूँ', 'साइलाज दरद', 'शापितरक्त बीज', 'रगमंच' आदि कवितावा मिनखाचार रै टोटै अर अमूर्तण पण री साख भरै ।

पद्यश्व

पण कवि रो मूल स्वर आप री पैछाण रो स्वर है । आ परिवेसगत विकृति माथे आबुकदाई वाग करै नकावपोस सो, मूँडा नै उघाड़ै । मिनखाचारै री वन्दना-मंडल करै । कवि रै 'प्रेम' री दूव हरी भरी है, बीमं मोटी रै बलिदान री गंध है । बिखरयोड़ा मिनखा रो 'जुडाव' है । 'अबोली बाता' करण रो चाल है, आंसू रै फूल पर मधरी मुलक है ।

कवि प्रयोगधर्मी है । पारम्परिक उपमानां नै जिन्दगी रै यथार्थ सँ जोड़ै ।

डॉ० नरेन्द्र भानावत



रंगमंच

बार बार

रंग-रूप बदल र

वेग-भूसा पलट र

भेज दियो जाऊं

टय रंगमंच पर,

जिण री

अणूनी चमकती रोमण्या में

सिद्धमल्ल हृन्दरजाळी अन्धारां में,

मीठी मस्तानी हंसी में

नमीली फुगफुमाटां सूं

हृष जाऊं चमकूंगो-र

भूल जाऊं-कै

हैं बूण हू ?

मनं बिण पात्र रो धाम करणो है ?

हृष गौर तारा-मांय

शायदर री अवाज भी दब जावै-र

आत्र भी

अवत्राण अघणंणो गी

राइयो हू

हृष रममय पर भर

नाटक री गमं

नेत्री मू

गुत्रणी रंग री हू ,

आत्मा

हैं

जुगा रें किनारां

बीनाळें बेयनी

बेरुपी नदी हू

सूरज

म्हारे

किरणा रें डोंगं मू,

दुन्दरधनुस गे कांचळी'र

मावणीं घटावां गे माटणी लहगों

मी-र

फुवारां री भीणी चूदड़ी वर,

बीजळयां री बनार लगावे,

मनै

तारा

नगजडिया कनफूल'र

चान्दी

चन्द्रहार

पैरायें,

वसन्त

म्हारी चोटी सिणगारें

र

उपा रो कूं कूं म्हारी

माग भरें,

भर
मिमा गी मलाई
म्हारै काजळ आंजै
र
नुई बीनणी मी
मजी धजी
हैं

मदा दुआगण
म्हारै लैरा रै होठां मूं
बिजोग रा गीन गाऊ
र ,

भाह्या मूं
अपविष्या मोनी
टाकानी रैयूं
र

महा भागर गू
महा मिसन रै घाम्ने हू
जुगा जुगा मूं

धैरवी रैई हूं
र
धैरवी रैयूं

जिन्दगाणी र मोत

दियासलाई

जगी

बुझगी,

पलकां

उठी-झपकगी,

हथेळ्यां

मिली-

जुदा हुगी,

वरफ री किरचा

उछळी-

घुल्ल र पाणी हुगी,

दो पंछी

उड्या-

अलगा हुग्या,

परछाई

वणी-

मिटगी

तार

टकराया-

दूर हुग्या,

बाळू री लकीर

वणी, डैयगी,

ओम री बून्द

घरसी-

सूवगी,

पगा रा निमाण

मड्या-

मिटग्या

पसीनो आयो-

किन्नी,

उद्दी, कटगी

चिपमारी

चमकी-बुझगी.

अकासियो

अन्धारे रै खम्भे
टप्यो हूँ
अकासियो,

रात रै जं'र नै
पीवं हूँ
अकासियो,

अमूर्त री घुटण
घुटै हूँ
अकासियो

आन्धी री पीढ़ पी
मुलकै हूँ
अकासियो,

रान भर अँखल्लो
बल्लै हूँ
अकासियो,

दूजो रै गानर
जगी हूँ
अकासियो

अधियारै माथे
उखाळै गी जं
प्रगटै हूँ
अकासियो,

इतारै मन माथ
मँबल्लन हूँ
अकासियो

कलम रौ सातो

कलम री कुळण
 काणी,
 कलम रा आसू
 कविता,
 कलम री घुटण
 साहित्य,
 कलम री जळण
 कला,
 कलम री चिन्ता
 दरसण,
 कलम री लोई
 इतियास,
 कलम री जुवान
 भासा.

आज री मिनख

हर आख	हर तन
!	—
हर चैरो	हर मन
?	{ [()] }
हर होठ	हर पग
()	।
हर कान	हर सुख
;	@
हर हाथ	हर दुख
÷	+
हर साथ	मिनख बस
%	चिन्त ई चिन्त.

बैमोला रिस्ता

लाग जावे

जणै

ऊंजळ दातां में

कोई काळो कीड़ो-

तो मसूड़ा भाय गैराई सूं गडियोडा

दांत भी

हिल जावै-

जड़णं सूं.

होळें होळें

दाड़ा-दान्त

सहन लागै

भरण लागै,

बिगड जावें मूळें रो स्वाव

समाजावें सांसां में बास

पण

मोह आन्धो मन,

इण सडियोडा दातां नै

आप रं हाया

उखाड़ फैंकण रो,

निकलवावण रो

करं नही सा'स-र

जडा छोडियोडा दांत

मूनां-जागता

खावतां-पीवतां

हंसता-बोलता

दै'ता रं

एक तीखो दरद

एक गैरी टीस-कै

आदमी छटपटावतो रं.

जुड़ाव

जणै

किणी आँख रा आँसू

म्हारै

आखड़ल्यो माय

घुल जावै,

जणै

कई हिरद रो दरद

म्हारै

कालजे री कुल्लण

वण जावै,

जणै

कई री हार

म्हारै

जिनगाणी रं पगा नं

यका देवै,

जणै

कई रो भार

म्हारै

मन रो भार

वण जावै-

जणै

किणी रं मन रो सुख

म्हारै

होठां री मैन्दिया, मुल्लक

रच जावै-

तो हुवै पतियारो-कै

अजै ताई

मिनख-मिनख सू

पूरी तरिया कोनी टूटयो,

कठई न कठई

गैराई में जुड़ियोडो है .

परम्परावां

जूनी अध्यारी
सकड़ी संकड़ी
कोटइयां मांय
कंद,

आपा सगळा
सूत्यां ह्रीं
मैली बासती सीरखां सूं
मूंडा डक 'र,

जिणमे आपां
पुराणी सांसां नै
फैलूं पीवां 'र
छोड़ दां,
फैलूं लेवा 'र
पाछी छोड दां,

कुण जाणै कद
आपां
ए सीरखा-कोटइयां सू
मुगती पामां ?
कद ताई
ओ जैरीलो
चक्कर चालसी ?
कद हुयसी
दिनुगो ?

आज रो घर

आगण

उफतियोडो,

कमरा

अमूजियोडा,

साळ-बरसाळी

राह सुळगायोडी,

बैठक

मूढो सूजायोडी,

रसोई

सुळगती,

पड्ढो

भभका मारतो

मिन्दर

चित्लाडा मारतो

मेडी

माथो पीटती,

भीता

भी लायोडी

बांडा-बारपा

डरपीजियोडी

घाळा-अलमारया

लुळता

जाळी-क्षरोखा

क्षरता,

नाला-परनाला

तिस्सा

छता

आसूं टपकावती,

छता-दुछता

मुंढा सियोड़ा.

भेवरा-तहस्राना

आंसू पियोड़ा,

घोरी मोड़ो

बन्द

डागळो

मायो सुकायोड़ो,

अरतण-बरतण

खड़कता

सीरल-पथरणां

झगड़ता,

अगाड़ी-पछाड़ी

सम्बन्ध तोड़ियोड़ा

अड़ोस-पड़ोस

भूँढो फेरियोड़ा,

गळी

मेण मुस्कली

-चीक

चोफाळिया,

भे है घर रा हाल

आ है जमाने री चाल !

कैवटस र हूँ

मैं कैवे

"धनो अपसुगणी हूँ
भर में थोर उगाणो."

परम्परावाँ र आधुनिकता र
वरणसंकर - हूँ
कैवटस तने खड्यो सोचू-
क इणनं धार फेकू क नही ?
क कैवटस ताना देवतो मुळक'र
जुगां सू कांटा सियांड़ी,-
जुबान खोली-

"म्हारा काटा
इत्ता जंरीला कोनी
जित्ता धाणो
खड्यो र परम्परावाँ रा,

म्हारा पंजा
इत्ता जामलेबगिया तो कोनी
जित्ता धाराँ अनुसन्धाणा रा

हूँ इत्तो
सरब नासी तो कोनी
जित्तो धारो सम्म जुग रा जुद्ध,

म्हारं हिरदं मे
धिरणा-बैर-हिसा रो
बो जैर तो को बैवे नी

जिको

हर समै धारी रगों में

वैवे खून बण र,

मनै लाग्यो

चांद मंगळ री ऊंचाया पर,-

उडण वाले

पताळ री गंराया नापण वालो

इत्ता धरमां

इत्ता मिद्वान्ता

इत्ता अनुसंधानां र

इत्ती सदियां' रै

पयोधिया सूं

मभ्यता रै मिखर पर अडियोड़ो

हूं भिन्न

इण काटेदार

कैवटम रै मामै

एक बायनियो हूं."

हूँ बी और नोट हूँ बी

परिवेश

एक तात्

एनी आत

उणमें चिमकें

काळी किरणों याळो

एटमी मूरज,

धरती

छिजती-पिघळती

धोषी-मतळी

बरफ री पडत,

जिण भायें

हाथां में तीती छुरयां-

तलवारी मियां

काटती-भाजती

गेंही लूवा

चकरीबम हुयरी है,

मातावरण

धुलतो-दमघोटूं

मसाण,

जिण भायें छायोडी है

रेडियोघरमी कळावण,

चीकेंर

मृत्यु रा सरणाटा

बम्बा रा धमीड़ा

आभा री गरजां-र

लेसर किरणा रा पळका,

सावण-फागण

हर जगा
 दारू रो धुवो
 आग'र लोई रो समन्दर,
 हर मूँढ़े
 मीत रो धोखा-'र
 मानव' री हार रो बलमस,

इण रें बिवाळें खड़यो
 सतुरमुरगी घरमी
 बावनियो अरजण-हूँ
 सोबू-कं
 दू बी और नोट दू बी

सरजण रो मोल

मीपियां रें मोर्यां रो
 मोल तो
 मूर्यो गयो

पण कुण कूर्यो
 दुसड़ी
 आं बापही मीप्यां रो ?

लाइलाज दरद

[एक चिट्ठी—जिकी हर हाथ री—हर घर री है]

घर सू आई है चिट्ठी कं
डाइविटिक बापू रो
किणी तरियां भरै नही है घाव कं
सू या भी असर करै नही—
(क्योंकि खरीदण नै पईसा कोनी)

आख्या हुवती जावै कमजोर
चिट्ठी भी लिखी-पढ़ी जावै नही,
बिन पेन्सन वाली सेवा छूटण रं बाद
मिली प्रोविडेंट फण्ड री रासि सू
इण अपाहिज हालत मे
जीवण री गाड़ी गुड़कावण नै ई
खोली ही दुकान
उणरो सगळो समान
उठायो उधार,
कोई भी चुकावण री हालत मे कोनी
र बिना समान री वा दुकान
अब हूयगी बन्द—
र चूल्हो वालण नै भी कोई
देवै नही दियासलाई उधार,
सो ध्यान रैवै
आगे ममंचार है कं
मां रं गोडा रों बरसा बूढी द्यूमर
उणनै—उठण कोनी देवै.
सगळा केवै कं
बिना इलाज
मा हुयजासी लूली—पामली ...
ध्यान सू बाचीजं
कंवारी वैन बढती जायरी है ताड सी—
र दहेज नी माग बढती जायगी है
वाळ में बढतां मोल ज्यू
लोग केवै मूढामूढ कं

ए सावँ भी
 आ छोरी रँ जासी कंवारी-
 आ भाग जासी किणी लुच्चे लफगे रँ लारं
 या कर लैसी कुवा-खाड.

एक समंचार ओरुं
 छोटोडो भाई हुवतो जा रियो है
 आवारा गर्द के स्कूल जावँ नई”.

चिट्ठी पढ र मन लागे
 जाणै म्हारै मन री गैराई में
 कोई तीखी आरी
 चीरती चलीगी-मनै.

फेरु बखत री निरदयी बाबा मे
 हूँ हवालँ कर दूँ खुद नै
 पख नुचियोइँ लोह लहाण पंछी समान-
 कपोक

पिताजी रँ गैगरीन रो घाव तो
 एक लाम्बै समै सू
 रिम रियो है भवाद-म्हारै मन में.

मां रँ गोडां रो दरद
 लाग धूक्यो है
 म्हारी जवानी रँ पगां मे,
 बँन रँ बदन री बघती चांदसी,

छा चुकी है सफेदी बण'र
 म्हारे माथँ, मूठं र सरीर पर,

भाई री आवारागदीं
 घुल री है रग रग मे

रगत बैसर सरूप
 बढते करज, मैगाई र दहेज रो दरद
 घटख रियो है

म्हारी रीठ री हड्डी मे-जिको एकसरँ री पकड मे भी
 कोनो आवे

हूँ एक लाम्बी-ठंडी सांस छोड़ र हुयजाऊँ चुप
 के

ए समझा दरद ला-डलाज है.

बिरखा राणी

नीतरपखी बादळ्यां री
मंहगो लहराती
इन्दर धनुस री
रग मुरंगी कांचळी कमाती
झोणी झोणी फूवागं मे
चूनडी उडाती

बीजळियां रं होडां
मीडा गीनलडा गुजाती
सावण—
लोह ऊचाती
फागण—
चंग बजाती

मादळ बादळिया हुलरांती
तेजे री तान उठाती
आकामी गगालहरांती
माघन—रंगी
फागण रचंगी

रग जमानी, मदमाती—
आ कामणगारी
बिरखा बीनणी.

भरम

सपनां रा मिरगला
भरता रैया
कुळाचा
रात भर
बालू री लैरा न
पाणी समझर,
पण
तोड़ नाखो
उणा रो दम
दिनूगे री
किरणा री लैरा.

बिजोग

बीन रटि हे
जिन्दगी
उणी भांत
जियां
मांसल रात न
आलणें तूं
पछीड़ो,
भटवयोड़ो
डाफा मारतो फिर
अंध्यारी रात मे.

सपनां रा घरकोलिया

सामलै
चोगान मांय
टावरिया
बणावै
माटी रा घरकोलिया,
पण
कोई काळा
कठोर पग
भांस जावै
आ घरकोलिया नै-
तो
मनै लागै-क
जाणे
इणी तरियां
कोई अणदेह्या पग
माटी मे मिला जावै
म्हारै सपनां रं घरकोलिया नै.
र हूँ
डब-डब नैणां सूँ
तिढ़वयोही माटी सूँ
मुठ्या भरतोई रह जाऊं !

शापित रक्तबीज

म्है

स्टेनलैस स्टील जुग रा ही,

म्हारां गुण निराळा है-

म्है नित

चमकता-धिलकता दियां ,

इण चमक लारै

हर काळै-धोळै नै

लुकाळा,

म्है

इसा धीकणा-तिसळणां हीं कै

दाग कै छांट

म्हा पर टिक ई नी सकै,

म्है

हर कळक-भूड नै

संकर भगवान दाई

मुळकता-हसता

लोक हित मे

पी जावां.

म्है स्टेनलैस

प्रेसर कूकर दाई ही-

जिण माय

सो कई पच जावै

लकड़-परयर सै

हजम.

म्हारी भूख इसी कै

देखता देखता

बडा-लोठां पुळ डकार जावा

लाम्बी-मोटी सड़का गिटक जावां

डीगा डम्बर भवन निगल जावां
बड़ी-मोटी योजनावां जीम जावां
देम-सीमावां मं बंध सावां,

म्हारी

तिरम इसी कं

संसद-संविधान नै,

न्याय-धरम नै

ग्रान्त-राजा नै

आस्या मोंच

अणछायें पाणी दाई पी जावां-

म्हानै

मित्यो है इसो भरदान कं

जिण मायें म्हे हाथ राख दां

बो ही स्वाहा-

गेहूँ-चीनी स्वाहा

पासलेट-पेट्रोल स्वाहा

गिमट-लोहो स्वाहा

राज-राजनीति स्वाहा

भाग्य-गादिय स्वाहा

कला-ब्यापार स्वाहा

सम्यता-संस्कृति स्वाहा

नीति-नैतिकता स्वाहा

मिनख-मानखो स्वाहा

स्वाहा.

म्हे

इसा चमत्कारी बिधाता हौं कं

कालें नै धोळो

मधें नै घोड़ो

अभिनंता नै नेता

पापी नै धरमी

अम्मानो नै ग्यानी

बणावणों

म्हारे डावें हाथ रो खेल है

म्है

चुटकी बजार्
टाटवाळें नै खादी
भगवां नै घोळा
हरा नै लाल
गाभा बदळवा दां—
चावां जणे
भला भला नै
नागां करदां

म्है

अंगूठा दाम नै
महाकवि कालिदाम अर
महारिशी वाल्मीकि नै
महामूरखानन्द बणां नाखां
म्है

हत्या नै आत्महत्या
आत्महत्या नै छून.
धरम नै सम्प्रदाय
दंगी नै घंघो
जाति नै पाति,
रोट नै घोट
घोट नै मोट बणा दा

म्है

इमा नियामक हां कं
बीलदां वो कानून है
करदां वो कायदो है
म्है चावा उणानै
नचा नाखां
नाकां चिणां धबा नाखां,
म्है हां रक्त बीज !
जठं म्हारें शूक री लाळ पड़ जाय
काळा बजारी—तस्करो

घोरी, टकंती, हत्या
 अन्याय-अत्याचार
 नुषां नुषां रक्तपीज जीवणघा
 दिन दूषां रात धोषणां
 बधता जासां कं
 म्हे दण देम नै
 रक्त बीज देस बणा'र ही दम लेयां

म्हे
 स्टेनलेंस जुग रा हा,
 म्हारां गुण निराळा है,
 पण
 मराप एक भोगा हां क
 म्हारे मूढे जडियोडा ताळा है.





- नाम** : लक्ष्मीनारायण रंगा
- शिक्षा** : एम. ए. हिन्दी
- रंगमंच** : लेखन-निर्देशन, मंचन अर अभिनय री
25 बरसा री अनुभव/अखिल भारतीय
स्तर पर पुरस्कृत ।
- आकाशवाणी** सन् 1960 सू हिन्दी अर राजस्थानी
नाटका, कवितावा, कहानिया अर
वार्ताआ री लगातार प्रसारण ।
- लेखन** : हिन्दी अर राजस्थानी री 15 पोथ्या
प्रकाशिन/अखिल भारतीय स्तर री अर
अन्य प्राता री पत्र-पत्रिकावा मे
कवितावा अर एकाकियो री प्रकाशन ।
प्रान्तीय स्तर पर पुरस्कृत ।
- संगठन** : 1. बीकानेर युवक समारोह री आयोजन
2. बाल-नाट्य-समारोह री जयपुर मे
थ्री मणेश ।
- सांस्कृतिक** : 1. लोकसंगीत, लोकनृत्य अर नाटका
माय विश्वविद्यालय युवक समारोह
मे प्रतिनिधित्व
2 अखिल भारतीय सांस्कृतिक
समारोहा मे भागीदारी
3. शिक्षा री पाठ्यक्रम मे रचनावा
संकलित